

**NILAI INTEGRITI PADA KITAB AL-HIKAM KARYA SYAIKH IBNU ATHA'ILLAH
AS-SAKANDARI: SATU TINJAUAN UMUM**

Mohd Fauzee bin Harith
*Fakulti Pengajian Islam, Universiti
Malaysia Sabah
E-mel fauzeeharith267@gmail.com*

ABSTRAK

Tasawwuf dan Integriti adalah dua istilah yang tidak boleh dipisahkan antara satu dengan yang lain. Kedua-dua bidang ini mengkaji secara mendalam, punca masalah atau penyakit hati beserta solusi untuk menyembuhkannya. Kedua-duanya menggunakan riyadhah an-nafs (latihan-latihan spiritual). Tasawwuf adalah kaedah manakala Integriti pula adalah keseluruhan sifat mahmudah yang lahir dari *metode* latihan ajaran tasawwuf itu sendiri. Ketiadaan sifat integriti bukan sahaja membinasakan peribadi, malah mampu merosakkan prestasi dan nama baik sesebuah organisasi. Namun pada era globalisasi khususnya di Malaysia, kita dapat melihat seperti adanya garis pemisah antara dua makna ini. Kursus-kursus berkaitan Integriti cenderung kepada pelaksanaan program bersifat material (luaran) dan sangat sedikit ilmu berkaitan kerohanian dibincangkan dalam sukatan kursus Integriti. Oleh itu tinjauan ini menekankan betapa pentingnya mempelajari Kitab Thurath tasawwuf dalam membentuk keperibadian berintegriti tinggi. Kitab al-Hikam karya Syaikh Ibnu Atha'illah As-Sakandari dilihat sebagai salah satu kitab tasawwuf utama yang perlu digali dan diambil manfaatnya, serta diselaraskan sebagai salah satu subtopik mahupun modul dalam kursus atau program berkaitan Integriti pada masa akan datang.

Kata Kunci: Tasawwuf; Integriti; al-Hikam

1. PENGENALAN

Kitab Al-Hikam, yang ditulis oleh Imam Ibnu Atha'illah as-Sakandari, adalah sebuah karya yang cukup terkenal dalam tradisi tasawwuf Islam. Selain dipelajari oleh hampir seluruh institusi pondok, maahad tahfiz dan madrasah di nusantara, 264 kata-kata mutiara dalam kitab ini juga seringkali disampaikan oleh para pendakwah dalam berbagai majlis sama ada secara formal mahupun non-formal. Kitab ini juga menjadi bahan kajian akademik oleh ramai pengkaji termasuklah orientalis barat terkemuka seperti Victor Danner dan Annemarie Schimmel.

Kajian kitab al-Hikam sebelum ini banyak menekankan aspek pemikiran sufistik Imam Ibnu Atha'illah dan tidak berlebihan jika penulis katakan, keseluruhan ajaran tarekat syadziliyah sebenarnya telah dicurahkan menerusi karyanya ini. Beliau juga masyhur dikenali sebagai mursyid tarekat syadziliyah yang ketiga selepas gurunya Imam Abu al-Abbas al-mursi dan pendiri tarekat ini, Syaikhul Akhbar Imam Abu Hasan as-Syadzili.

Selain mengandung pembelajaran ilmu tauhid dan ilmu tasawwuf, kitab ini telah menekankan pelbagai aspek integriti untuk menjadi hamba yang sempurna. Beberapa nilai integriti yang seringkali ditekankan dalam kitab Al-Hikam termasuklah nilai sabar, amanah, ikhlas dan sebagainya. Bukan sebagai kata sahaja, malah hakikat setiap nilai itu juga turut dikupas dan disyarahkan oleh para ‘alim ‘ulama. Kajian ini akan meninjau nilai-nilai integriti yang boleh digali menerusi khazanah kitab turath. Sebagai penanda aras, penulis memulakan tinjauan dengan kitab al-Hikam.

2. METODE PENELITIAN

2.1. Pendekatan dan Jenis Penelitian

Pendekatan yang digunakan dalam tinjauan ini adalah pendekatan filosofis yang berperanan membuka wawasan berfikir untuk menyedari fenomena dibalik sesuatu yang tampak, sekaligus mampu menyerap inti, hakikat atau hikmah dari apa yang diyakini, bukan sebaliknya melakukan tanpa makna.

Jenis penelitian yang digunakan pula adalah pendekatan kualitatif iaitu kajian pustaka yang diperoleh melalui dua sumber iaitu:

2.1.1 Data Primer: Kitab Al-Hikam karya Imam Taj-Al Din Abu Al-Fadhl Ahmad bin Muhammad bin Abdul Karim bin Abdul Al-Rahman bin Abdullah bin Isa bin Atha’Illah.

2.1.2 Data Sekunder: Buku-buku yang relevan berkaitan integriti dan tasawwuf.

2.2. HASIL PENELITIAN DAN PEMBAHASAN

Hasil penelitian mendapati, terdapat banyak nilai-nilai integriti yang terkandung melalui kata-kata hikmah Syaikh Ibnu Atha’illah. Konteks perkaitannya secara umum seperti yang terdapat pada jadual di bawah:

Jadual 1

Nilai Integriti	Kata-Kata Hikmah dalam al-Hikam	Penerangan Ringkas
Amanah	<i>“Allah mendatangkan warid kepada anda untuk mengeluarkan anda dari lingkungan adanya anda kepada pandangan mata hati anda yang teramat luas”</i>	Warid datang sebagai tanda keberhasilan dari wirid. Ianya boleh berupa rezeki yang luas mahupun dikurniakan kehormatan. Seorang hamba haruslah amanah terhadap apa sahaja nikmat yang diberikan oleh Allah SWT.
Bertanggungjawab	<i>“Menunda amalan kerana menunggu wujudnya waktu lapang terlebih dahulu adalah sikap yang timbul dari kedunguan hati.”</i>	Menunda sesuatu amalan adalah sifat mazmumah yang menghambat integriti. Seorang hamba seharusnya bertanggungjawab dalam menyusun amalan seharian.
Ikhlas	<i>“Amal itu seumpama jasad, sedangkan keikhlasan adalah ruhnya.”</i>	Amal perlu dilakukan secara ikhlas bagi mendapatkan keredhaan
Sabar	<i>“Janganlah kerana kelambatan masa pemberian Tuhan kepada kamu, padahal kamu telah bersungguh-sungguh berdoa, membuatkan kamu berputus asa sebab Allah menjamin untuk menerima semua doa menurut apa yang dipilihNya untuk kamu, tidak pada waktu yang kamu tentukan.”</i>	Syaikh mengajar kita untuk senantiasa berbaik sangka terhadap Allah SWT dan menjamin segala usaha mahupun permohonan daripada para HambaNya akan dikabulkan apabila waktunya telah tiba dan bukan mengikut kehendak hambaNya.
Dedikasi, Tekun dan Berdisiplin	<i>“Orang-orang yang baru melangkah menuju kepada Allah menerima petunjuk melalui cahaya tawajjuh...”</i>	Hidayah atau petunjuk Allah SWT datang dari hasil dari ketekunan melakukan ibadah dan latihan rohani.
Sederhana	<i>“Tidak dapat dianggap sedikit amal perbuatan yang dilakukan dengan hati yang zuhud, dan tidak dapat dianggap banyak amal yang dilakukan oleh seseorang yang cinta dunia”</i>	Bersederhana dalam segala aspek mendekati diri kepada rasa qana'ah (sentiasa merasa cukup) dan tidak melihat akan nikmat-nikmat yang lain.
Bersih	Secara umum, keseluruhan kata-kata hikmah dalam kitab ini adalah modul tarbiyah untuk pembersihan jiwa (tazkiyatun nafs) - penulis	Bersih yang dimaksudkan oleh syaikh bukan sahaja kebersihan zahir (wudhu, pakaian, tempat ibadah dan sebagainya), malah yang paling utama adalah kebersihan hati (batin)
Bekerjasama	<i>“Jangan anda berkawan dengan orang yang hal keadaannya tidak membangkitkan anda dan ucapannya tidak menunjukkan kepada anda jalan menuju kepada Allah”</i>	Berkawan dengan sahabat yang mempunyai akhlak baik agar dapat saling bantu membantu dalam mengerjakan amal kebaikan.
Berbudi Mulia	<i>“Perkara yang tersimpan di dalam hati, akan nampak pada kenyataan zahir”</i>	Adab yang baik adalah tanda baiknya adab batin.

Bersyukur	<i>“Barangsiapa yang tidak mensyukuri nikmat Tuhan, maka bererti berusaha untuk menghilangkan nikmat itu, dan barangsiapa mensyukuri nikmat bererti telah mengikat nikmat itu dengan ikatan yang kuat”</i>	Setiap pemberian perlu didasari dengan rasa syukur. Kerana setiap nikmat itu bukannya hasil dari tangan hamba itu sendiri, melainkan hanya dari kurniaNya semata.
-----------	--	---

Rujukan Nilai Integriti: Nilai dan Etika dalam Perkhidmatan Awam (INTAN, 1991)

2.3. Pembahasan

Selain nilai yang dikemukakan dalam jadual di atas, masih terdapat banyak nilai integriti yang tidak dibahas dalam tinjauan ini, namun terdapat dalam kitab al-Hikam seperti taubat, takut, zuhud, tawakkal, adil, redha dan sebagainya. Nilai integriti ini juga turut dikenali sebagai sifat *mahmudah* atau lebih dikenali sebagai *maqamat* (merujuk istilah yang digunakan oleh ahli tasawwuf). Ini menunjukkan betapa pentingnya warisan kitab turath dalam mengukuhkan lagi pemahaman kita mengenai makna integriti.

3. KESIMPULAN DAN SARANAN

Terdapat banyak kajian mengenai pembudayaan integriti telah dilakukan oleh Institut Integriti Malaysia (IIM), Akademi Pencegahan Rasuah Malaysia (MACA) dan lain-lain agensi. Namun, pembudayaan integriti menerusi pendidikan turath masih dilihat sebagai suatu khazanah yang tersembunyi. Disarankan selepas ini kedalaman makna integriti dapat digali secara meluas menerusi kita-kitab turath tasawwuf yang kaya dengan hikmah dan mampu memperdalam lagi ilmu berkaitan integriti pada masa akan datang.

RUJUKAN

1. Al-Bouti (2005). Al-Hikam Al-Ata'iyah Syarh wa Tahliil, Daar Daqoiq, Malang.
2. Faisal Ahmad Shah, Hanafi Hamdani (2017). Konsep Integriti Menurut Hadis Nabi, Penerbit Universiti Malaya, Kuala Lumpur.
3. Heriyanto, Husein (2011). Nalar Saintifik Peradaban Islam, Mizan, Bandung.
4. Nilai dan Etika Dalam Perkhidmatan Awam. 1991. Cetakan 1. Malaysia: Institut Tadbiran Awam Negara (INTAN).
5. Sa'id Hawa (2013). Ulasan Kata-Kata Hikmah Syeikh Ibnu Atha'llah As-Sakandari (Al-Hikam-Terjemahan: Dr. Basri bin Ibrahim), Perniagaan Jahabersa, Johor Bahru.
6. Zulkifli bin Mohamad al-Bakri (2008). Integriti Dalam Islam, Penerbit Universiti Sains Islam Malaysia, Negeri Sembilan.